



Inatsisartunut ilaasortaq Naaja H. Nathanielsen, Inuit Ataqaigiit  
MAANI

**Jameson Land pillugu § 37 naapertorlugu apeqquummut nr. 2015-184-imut  
akissuteqaat**

Inatsisartut suleriaasianni § 37, imm. 1 naapertorlugu Naalakkersuisunut apeqquut  
matuma kinguliani allassimasut saqqummiuppatit.

6. august 2015  
Sagsnr. 2015-6919

Postboks 930  
3900 Nuuk  
Tlf. (+299) 34 68 00  
Fax (+299) 32 43 02  
E-mail: mmr@nanoq.gl  
www.naalakkersuisut.gl

- 1. Suliffeqarfik Greenland Gas and Oil ungasinngitsukkut Jameson Landimi uuliamik ujaasinissamut akuersissutinik marlunnik pissarseqqammersoq, ujaasinerup immikkoortuani siullermi avatangiisit pillugit nalunaarusiornissamut imaluunniit tusarniaanissamut pisussaaffeqarpa? Taamaattoqanngippat tamanna soq Naalakkersuisunit pisariaqarsorineqannginnersoq nassuiaqqara.**

Akissut:

Greenland Gas and Oil (GGO) aatsitassanut ikummatissanullu inatsimmi § 16 malillugu akuersissutinik marlunnik tunineqarpoq. Taamaattoq aatsitassarsiorluni imaluunniit qalluilluni ingerlatassat suulluunniit ingerlaannartumik akuersissuteqarfigineqarnerannik akuersissutit malitseqanngillat. Aatsitassanut ikummatissanullu inatsimmi § 86 malillugu akuersissummut atatillugu ingerlatassat, ingerlatassat taakkua aallartinneqannginneranni, immikkut Naalakkersuisunit akuersissuteqarfigineqartussaapput. Taamaalilluni GGO ingerlatassat eqqarsaatigisamik, taakkua aallartinneqannginneranni, akuersissuteqarfigineqarnissaat pillugu qinnuteqaateqartussaavoq.

Aammattaaq aatsitassanut ikummatissanullu inatsimmi § 73, imm. 2 malillugu ingerlatassaq annertuumik avatangiisinut sunniuteqartussat ilimagineqartariaqarpat, avatangiisinut sunniutaasussanik nalilersuineq suliarineqareerpat aammalu tassunga nassuiaat Naalakkersuisunit akuersissuteqarfigineqareerpat (VVM-imut nassuiaammik taaneqartartoq) aatsaat ingerlatassamut akuersissummik tunniussisoqarsinnaavoq aammalu akuersissuteqartoqarsinnaalluni.

GGO ingerlatassat eqqarsaatigisaminnut akuersissuteqarnissaq pillugu qinnuteqaammik suli nassiuussingilaq, taamaattumik Aatsitassanut oqartussaasoq aatsitassanut ikummatissanullu inatsimmi § 86 malillugu akuersissuteqarnissamut suliap ingerlanerannik suli aallartitsisimanani, tassanilu ilaavoq inatsimmi § 73 malillugu avatangiisinut tunngatillugu isumaliutersuuteqarnerit. Tamanna aamma pissutigalugu aatsitassanut ikummatissanullu inatsimmi maleruagassat nalinginnaasut malillugit tusarniaanerusinnaasoq suli aallartinneqanngilaq.

**2. Piffimmut akuersissuteqarfiusumut suliffeqarfik Greenland Gas and Oil kisimiilluni qinnuteqartuusimava?**

Akissut:

Jameson Land-imut neqeroortitsinermi qinnuteqaatit marluk tiguneqarput, tamarmik blok 2-imut aamma blok 3-imut qinnuteqaataallutik. Qinnuteqaatip aappaa GGO-imeersuuvoq. Aappaa isertuunneqarpoq. Taamaalilluni qinnuteqaatit marluk unammilleqatigiissut tassani pineqarput, aammalu ingerlatseqatigiiffiit Jameson Land-imi nunami allaaveqartumik ikummatissiassarsiorluni misissuinissamut qalluinissamullu suliaasap kivissinnaanissaanut piukkunnassuseqarnerat Naalackersuisut nalilersorpaat. Naalackersuisut qinnuteqaatinut najoqqutassat aammalu najoqqutassat allat piniarneqartut tunngavigalugit qinnuteqartoq pitsaanerpaamik piukkunnassuseqartoq toqqarpaat.

**3. Masarsoqarfiup "Hedenip" iluani uuliamik ujaasisoqarnissaani Naalackersuisut Ramsar-konventionimi aalajangersakkat aammalu piffimmi pinngortitap mianernartup innarlitsaaliorneqarnissaanut maleruagassat tuuttut tamaasa ataqqiumallugit neriorsuutigisinnaavaat? Timmissat piaqqiornerini eqqissisimatinneqarnissaat eqqarsaatigalugit piumasaaqatit sanioqqutaarneqarsinnaaneri pillugit maannamut immikkut akuersissuteqartoqarsimava?**

Akissut:

Ramsar-imi nunani tamalaani isumaqatigiissut Kalaallit Nunaanni atorneqarpoq, aammalu Aatsitassanut oqartussaasup "Heden"-imut akuersissutini tunniunneqartuni nunani tamalaani isumaqatigiissutip naammassineqarnissaa pillugu aalajangersakkat ilannguppai. Akuersissutini marluusuni Artikel 9.03 malillugu akuersissummut atatillugu misissuinerimik imaluunniit allatigut ingerlatanik Ramsar-imi nunani tamalaani isumaqatigiissummut, maleruagassanut tassunga atasunut imaluunniit Aatsitassanut oqartussaasumit aalajangersakkanut imaluunniit aalajangiinernut akerliusussanik, pisinnaatitsissummik pigisaqartoq sunilluunniit suliaqquusaanngilaq.

Tamatuma saniatigut akuersissutit malillugit (pisuni marluusuni tamatigut Artikel 9.05), pisinnaatitsissummik pigisaqartoq paaanissamut akuersissummik qinnuteqassappat, Aatsitassanut oqartussaasup nammineq naliliinermini, paaaneq Ramsar-imi nunani tamalaani akuersissummut, maleruagassanut tassunga atasunut, imaluunniit Aatsitassanut oqartussaasumit aalajangersakkanut imaluunniit aalajangiinernut naapertuutissanngitsoq nalilerpagu, Aatsitassanut oqartussaasup qinnuteqaat taamaattoq itigartissinnaavaa.

**4. Nunap qaavanit uuliamik ujaasinissamut atatillugu Naalackersuisut ilisimatitsippat "nutaamik misiliiniarlutik". Ullumikkumit piumasaaqatigineqatunit maleruqqusaasunillu allaanerusunik atuisoqassatillugu Naalackersuisut nutaamik iliuusissat pillugit allattugaatinik tamakkiisunik saqqummiusseqquneqarput, taakkulu aalajangiunneqarnerinut aamma tunngavilersueqquneqarlutik.**

Akissut:

2014-2018-imut Kalaallit Nunaanni uuliasiornermut aatsitassanullu periusissamut ilaatillugu aallaqaammumt Jameson Land-imi nunami aallaaveqartumik ikummatissiassaqaarfinni misissuinissamut qalluinissamullu neqeroortitsinissaq Aatsitassanut Ikummatissanullu Aqutsisoqarfiup pilersaarusiorpaa.

Jameson Land-imi nunami sumiiffimmi matu ammaassisumik taaneqartartumut periaatsimut, aningaasaliiumasussarsionissamut periarfissatut, akuersissummut atugassarititaasussanik aqqissuussinissaq, uuliasiornermut aatsitassanullu periusissami Naalakkarsuisut kissaatigaat. Neqeroortitsineri immikkuullarissumi tassani akuersissutit ikummatissiassanut misissuinissamut qalluinissamullu kisermaassisussaataaqqartut neqeroortitsivigineqarput, taakkua piffissanut 3-inut imaluunniit 4-inut agguakkamik, aammalu piffissap ilaa ukiunik 2-inik, 3-inik imaluunniit 4-inik sivilissuseqartussatut, ukiunik 10-inik aatsitassarsiorluni misissuinissamut piffissaligaallutik.

Qinnuteqartut piffissakkaartumik piukkunnassuseqarnerminnut peqqissaartumik uppersaasinnaassasut, peqatigisaanillu ukiunut 10-inut suliaqarnermi pisussanut pilersaarummik peqassasut piaaraluni aalajangiunneqarpoq. Taamaalilluni taamaallaat piffissap ilaa siulleq naliliiffigineqarpoq akuersissuteqarfigineqartussatullu inassuteqaateqarfigineqarluni. Aatsitassarsiorluni misissuineri ingerlatat suliarineqartut aallaavigalugit pisinnaatitsissummik pigisaqartoq naliliippat sumiiffik suli ujarassiornikkut soqutiginaateqartoq, pisinnaatitsissummik pigisaqartoq piffissap ilaanut tullermut ingerlaqqinnissaminik qinnuteqarsinnaavoq.

Ingerlatseqatigiiffinnut toqqaanissamut tunngavissarititaasut aamma akuersissummut atugassarititaasussat, sinerissap avataani ingerlataqarnermut naleqqiullugu nunami aallaaveqartumik uuliasiorluni misissuineri ingerlataqarnermi pisariussusaata arlerinaateqarneratalu annikinnerunerannut tulluurtuussapput. Tamatuma, uuliasiorfiuteqatigiiffiit akunnattumik angissusillit sumiiffinni kisermaassisussaataaaffiusuni paasissutissanik aallarniutaasussanik katersinnaanerata aammalu ingerlatseqatigiiffinnut anginerusunut paasissutissanik tuniniaaqqissinnaanerata imaluunniit akuersissummi piginneqataassutinik tuniniaasinnaanerata, immaqalu aamma ingerlatassat pisariunerulerneranni arlerinaataasullu annertunerulerneranni suliaqartuusup taarsersinnaanera, ajornarunnaarsippaa. Taamaaliornikkut Naalakkarsuisut ingerlatseqatigiiffinnut minnerusunut akuersissummik tunniussinissamik periarfissaqalerput, kisiannili kisermaassisussaataaqqarnerit sivilissoneqarnissaat sioqqullugu, peqatigisaanik ingerlatseqatigiiffiit suliaqarnerit pisariunerusut ingerlannissaannut piukkunnassuseqarnerannik ingerlaavartumik nalilersuinissamut pisinnaataaqqarlutik.

Akuersissutit tunniunneqarnerani pisinnaatitsissummik pigisaqartoq piffissap ilaanut siullermut aatsitassarsiorluni misissuinissamut pisussaaffiit isumaqatigiissutigineqartut suliarinissaannut pisussaaffeqalerpoq. Taamaalilluni ingerlatseqatigiiffik aallaqaataaniilli piffissat ilaasa tamatuma kingulianiittut suliaqarfiginissaannut pisussaaffeqalertariaqanngilaq, ilanngullugu assersuutigalugu aatsitassarsiorluni misissuineri qillerinerit. Kisiannili ingerlatseqatigiiffik sumiiffimmi misissuiffiusussami, soorlu assersuutigalugu sajuppillatsitsisarluni misissuinerit paasissutissanik katersuulluni, ujarassiornikkut aamma nunap qanoq sananeqaateqarneranut misissuinerit suliaqarnissamut pisussaaffeqalertarpoq.

Matu ammaassisumi Jameson Land-imi nunami neqeroortitsineq 1. september 2014 aallarnerneqarpoq aammalu blokkini pingasuni 2500-2900 km<sup>2</sup>-isut angissusilikkaani agguarneqarluni. Matu ammaassisumi suleriaatsimi qinnuteqaatinik suliarinninnermi siulliullutik tiguneqartut siulliullugit suliarineqartarnerat ilisarnaataavoq. Qinnuteqaatit arlallit ataatsikkut tiguneqarsimatillugit, taakkua unammilleqatigiittut suliarineqartarput.

5. Aatsitassat pillugit inatsit § 4, imm. 3-mi aalajangerneqareeraluartoq, Jameson Landimi uuliamik ujaasinissamut akuersissut pillugu Inatsisartut Aatsitassanut Ataatsimiititaliaannut soq immikkut ilisimatitsisoqanngila? Taamatut pisoqarnera eqqumiigivara, tassami Aatsitassanut Ikummatissanullu Aqutsisoqarfiup oqarneratut matumani akuersissutinik nutaamik periuseqarluni agguaassisarneq pineqarpoq, isumaga malillugu immikkut ilisimatitsisoqarneranik malitseqartussaagaluartoq?

Akissut:

Ilisimatitsissut aasaanerani sulinngiffeqarnerup nalaani suliarineqarpoq, taamaattumik nalinginnaasumik pisartunit sivilisunerusimalluni. Ilisimatitsissut ugartorneqartoq Aatsitassanut Ataatsimiititaliamut nassiunneqareerpoq.

Inussiarnersumik inuulluaqqusillunga

  
Andreas Uldum